

摘藻堂四庫全書薈要

集部

欽定四庫全書薈要卷一萬八千四百六

集部

御選金詩卷二十

七言絕句三

酈權

聞砧

玉關消息到長安處處砧聲搗夜闌想得月殘哀響斷
一燈清淚剪刀寒

夷門遣懷

梁園花木豔精神盡屬東風點綴人
雪雁老梅香不起
問君消得幾多春

慈恩塔

慈恩石刻半公卿時遇間人為指名
龍虎榜中休著眼
一篇俚賦誤平生

濟源廟海子內有二黿人以將軍目之
投餅餌
則至

我欲然犀起蟄雷謾誇海蘚紙錢灰
將軍不是池中物

也為區區餅餌來

裴公亭

十里蓮塘際碧山入潭無數竹根泉詩狂欲灑亭間壁
却媿文公與樂天

郊行二首

十里修篁翠拂天青田漠漠水濺濺高林忽斷驚回首
不覺奇峯墮眼前

溪橋納納馬蹄輕竹裏人家犬吠聲行盡灘光溪路黑

隔林燈火夜深明

景覃

感事

蘭芳切禁當門種李苦何傷並道生自古英雄足猜忌
莫教身外有浮名

段繼昌

梨花

一林輕素媚春光透骨濃薰百和香消得太真吹玉笛

小亭人散月如霜

一溪

一溪流水走青蛇
春在江邊漁父家
竹外寒梅看欲盡
清香移入小桃花

春早二首

魚兒水汎鴨頭綠
野馬塵飛羊角風
西崦山家籬落背
杏梢初見一分紅

斷冰銷盡荻芽尖
凍隴蘇來白薺添
幾片野雲飛不去

晚風吹作雨纖纖

讀紀信傳

鹿走中原兩虎爭
滎陽圍解事堪驚
當時拔劍論功者
矢口何人說紀生

靖天民

西子放瓢圖

髻鬟蕭颯葦蘿秋
千古香溪水自流
吳越兵爭竟何得
風流輸與五湖舟

王去非

題左丘明墓

寺厖孤墳墳已催墳前松柏亦凋衰未能遷寺還封樹
每到覩君一淚垂

李適

獅子峯

解脫眼光三界靜端公伎倆一時休雲開正使金毛現
子細看來是石頭

送窮

昔年曾作送窮詩
結柳齋糧擬退之
送去還來還復語
君家猶有讀書兒

劉濤

戲用前人語題天平別墅

表聖當年絹五千
休休亭下買林泉
黃華面目君還見
天柱峯高不直錢

李好復

邵智夫同游南城

園林晴畫蔚如煙
林外支流盡水田
落日趁墟人已散
鷺鷥飛上渡頭船

楊雲翼

陽春門堤上

薄薄晴雲漏日高
雪消土脉潤如膏
東風可是多才思
先送輕黃到柳梢

聞韶圖

千古神交寄至音聞韶想見聖人心容聲便落筌蹄外
後學休從肉味尋

蔡村道中

水連深竹竹連沙村落蕭蕭已暮鴉行盡畫圖三十里
青山影裏見人家

戴嵩畫牛

春草原頭雨濕煙夕陽渡口水吞天披圖坐我風蓑底
一夢長林二十年

雙成寺中登樓

雲意生陰晚不收
西風疎雨一江秋
畫圖忽上闌干角
隱隱平灣轉釣舟

閒閒公為上清宮道士
寫經并以所養鸞羣付
之諸公有詩某亦同作

會稽筆法老無塵
今代閒閒是後身
只有愛鸞緣已盡
舉羣還付向來人

劉中

龍門石佛

鑿破蒼崖已失真又添行客眼中塵請君看取他山石
不費工夫總法身

龐鑄

夏日

富國才疎合自羞清時無補但優游只知錢向紙中裏
不信能教地上流

花下

香滿西園曉雨微
萬紅千翠自高低
若為常作莊周夢
飛向幽芳闌處棲

未開牡丹

國香半吐醉顏酡
炫耀春工已自多
愛惜不教催羯鼓
更澆卯酒看如何

山行絕句

四面雲山玉作圍
一川霜樹錦為衣
翩翩數騎南岡下
傳粉王孫射鹿歸

墨竹三首

隔溪烟雨

一溪流水玉涓涓
溪上修篁接暮煙
誰倩能詩文與可
筆端移得小江天

秋風驟雨

瀾川急雨暗秋空
無限琅玕澹墨中
劒甲挺挺軍十萬
欲將貔虎戰斜風

春雷起蟄

千梢萬葉玉玲瓏
枯槁叢邊綠轉濃
待得春雷驚蟄起
此中應有葛陂龍

夷齊墓

絕粒當年恥化周
死於仁義更何求
首陽山下兩丘土
能使當年釣石羞

陳規

過驪山

豐鎬無由問故基
三章止見黍離詩
而今多少華清石

都與行人刻豔辭

王擴

題神霄宮清心軒

紛紛百慮自心生
方寸清來百慮平
未了此心私自笑
更憂時世欲澄清

趙伯成

蠟梅

凍蕾含香蠟點勻
古來幽谷有佳人
詩家只怨和羹晚

不道紅梅別是春

冷豔疎香寂寞濱
欲持何物向時人
東風自是清狂手
辦作竹籬茅舍春

趙思文

侯相浪溪歲寒堂

靜中臺榭隔紅塵
水色山光日日新
不用沿溪種松竹
主人元是歲寒人

張建

山村風雨圖

雨昏山店望未見風緊傘簷張不開莫訝披圖便成句
為曾行到此中來

王世賞

探梅

候得南枝破玉腮心顏今日為君開細看苔徑無行跡
先賞應輸我獨來

稱善齋

宦途馳逐只堪羞
何意須封萬戶侯
平日少游真可念
絕勝辛苦駐壺頭

李純甫

孫卿子

諸儒談性盡歸情
誰信黃河徹底清
未到崑崙源上見
且休容易小荀卿

謝安石

阿堅休道不英雄
兒輩俄成蓋世功
屐齒折時渠自著

至今人解笑桓冲

魏徵

健兒搖足據山東李氏家居大半空貞觀力排封建議
魏徵元只是田公

老蘇

宋季人憂大瓠穿敢留金幣不輸邊權書更信蘇家策
剝費青苗幾倍錢

子端山水同裕之賦

遼鶴歸來萬事空
人間無地著詩翁
只留海岳樓中景
長在經營慘淡中

馬圖同裕之賦

韓筆定襄霍益之家物

天馬飛來不苦難
雲屯萬騎開元間
太平有象韓生筆
曾見真龍如此閒

劉宋

六十衰翁血打圍
深山赤手搏熊羆
子孫只解相魚肉
辛苦知他為阿誰

燕 子

一別天涯十見春
重來白髮一番新
心知話盡春愁處
相對依依如故人

閩 長 言

送麗酒麗橙與秀實御史

驄馬朝回畫閣深
遙知春意領梅心
麗橙嬌軟麗尊小
聊助風流對淺斟

閩立本職貢圖

諤諤昌周此一書形容藝貢寫成圖寧知右相無深意
莫指丹青便厚誣

盤山招隱圖

畫出中盤望隱歸鳴珂朝馬尚遲遲賦詩未敢輕相誚
却恐吾山也勒移

三門集津圖

津門未為天下險勿作駭相觀茲圖偃月堂中李林甫
有人能寫此心無

馮璧

送人出使

陽春有脚蘇疲瘵
水鏡無心照潔汙
九道澄清天意切
人才一一似君無

習池醉歸圖

襄漢方屯十萬兵
習池日往不曾醒
紛紛悞晉皆渠輩
何獨王家一寧馨

東坡海南烹茶圖

講筵分賜密雲龍
春夢分明覺亦空
地惡九鑽黎洞火
天游兩腋玉川風

陰晦中忽見華山

吏部能開衡岳雲
坡仙曾借海宮春
蓮峯清曉忽自獻
二公何人予何人

草堂春暮橫披

遷客倚樓家萬里
五陵飛鞚酒千金
草堂澹與春山對
幽鳥一聲春已深

王若虛

復寄之純二首

志大言高與世違
拂衣真作竹林歸
黃塵道口風波惡
未必先生自處非

自笑趨塵亦強顏
食謀未免敢言閒
紫芝果可充飢腹
從子玉屏巖石間

感懷

枉却全家仰此身
書生那是治生人
百憂耿耿填胸臆

強作歡顏慰老親

自笑

酒得數杯還已足詩過兩韻不能神何須豪逸攀時傑
我自世間隨分人

別家

到了身安是本圖何須身外覓浮虛誰能置我無飢地
却把微官乞與渠

慵夫自號

身世飄然一瞬間更將辛苦送朱顏時人莫笑慵夫拙
差比時人得少閒

題淵明歸去來圖五首

此下皆中年所作

靖節迷途尚爾賒苦將覺悟向人誇此心若識真歸處
豈必田園始是家

孤雲出岫暮鴻飛去住悠然兩不疑我自欲歸歸便了
何須更說世相遺

拋却微官百自由應無一事挂心頭銷憂更藉琴書力

借問先生有底憂

得時草木竟欣榮
頗為行休惜此生
乘化樂天知浪語
看君於世未忘情

名利醉心濃似酒
貪夫衮衮死紅塵
折腰不樂翻然去
此老猶為千載人

還家五首

日日他鄉恨不歸
歸來老淚更沾衣
傷心何啻遼東鶴
不但人非物亦非

荒陂依約認田園
松菊存亡不足論
我自無心更懷土
不妨猶有未招魂

山杏溪桃化棘榛
舞臺歌榭墮灰塵
春來底事堪行處
門外流鶯枉喚人

回思夢裏繁華事
幸及當年樂此身
閒立斜陽看兒戲
憐渠虛作太平人

艱危嘗盡鬢成絲
轉覺諠譁不可期
幾度哀歌仰天問
何如還我未生時

山谷於詩每與東坡相抗門人親黨遂有言文
首東坡論詩右山谷之語今之學者亦多以為
然漫賦四詩為商略之云

絕足由來不可追汗流餘子費奔馳誰言直待南遷後
始是江西不幸時

信手拈來世已驚三江衮衮筆頭傾莫將險語誇勁敵
公自無心與物爭

戲論誰知出至公螭蟬信美恐生風奪胎換骨何多樣

都在先生一笑中

文章自得方為貴
衣鉢相傳豈是真
已覺祖師低一著
紛紛嗣法更何人

王內翰子端詩
近來陡覺無佳思
縱有詩成似
樂天其小樂天甚矣
漫賦三詩為白傳解嘲

功夫費盡謾窮年
病入膏肓豈易鐫
寄語雪溪王處士
恐君猶是管窺天

東塗西抹鬪新妍
時世梳粧亦可憐
人物世衰如鼠尾

後生未可議前賢

妙理宜人入肺肝
麻姑搔背豈勝鞭
世間筆墨成何事
此老胸中自一天

宮女圍棋圖

盡日羊車不見過
春來雨露向誰多
爭機決勝元無事
永日消磨不奈何

范中

贈韶山退堂聰和尚

郎當舞袖少年場
線索機關似郭郎
今日棚前閒袖手
却從鼓笛看人忙

戲作

嚼蠟誰知味最長
一杯卯酒地龍香
年來紙價長安貴
不重新詩重藥方

盧洵

白溝

白沙清淺不容舟
遼宋封疆限此溝
到了山河無定主

碧波依舊只東流

刁白

送花

縱橫詩酒少年曾老矣
追懽謝不能種出好花無用處
東隣乞與坐禪僧

許古

被召過少室

老病無堪合退休
伊川久已得菟裘
如今又上長安道

好被青山笑白頭

扇圖

雲歷溪塘小雪春融融和氣浥輕塵山禽共作梅花夢
物性由來懶是真

王良臣

狸奴畫軸

三生白老與烏負又現吳生小筆前乞與黃家穰鼠禍
莫教虛費買魚錢

雜詩

道人知我愛禪房
淨掃階前紫石牀
軟飽三杯風味好
脫巾和月卧昏黃

老子平生酷愛閒
天教行處得禪關
粥魚敲落簷頭月
猶在梅花醉夢間

殘陽收拾弟兄行
揀得機心不到鄉
安置小奴今夜夢
蘆花風細月如霜

舊花

蕎花冉冉密脾香禾穗累累鵲眼黃一縷晚煙吹不去
為誰著意護秋霜

絕句

流轉年光橋下水翻騰時態嶺頭雲溪翁道號奇聾子
除却松風百不聞

劉祖謙

雅集圖

翠雀翩翩野鶴孤玉京人物會仙圖後來且莫輕題品

席上揮毫有大蘇

崆峒山圖為橫溪翁賦

好奇仍有客相攜
絕頂披雲快一躋
三十六峯青似染
五年拄笏羨橫溪

獨占名山每羨渠
京塵今日汙吟鬚
西州十載經行處
惆悵雲煙是畫圖

劉鐸

春日

翠微深處幾人家風颺輕烟雨壓沙寒勒野桃開較晚
向陽纔有兩三花

所見

綸竿老子綠蓑衣細雨斜風一釣磯正是隣家社醕熟
柳條穿得錦鱗歸

讀李訓鄭注傳二首

誰教閭宦作權臣肅代優游到敬文三子謀疎誰不道
泄機也合罪劉蕡

碁醫入侍本防猜偶失機權亦可哀陳竇至今佳傳在
莫從成敗論人材

王彧

荅國寶

幻人誰拙復誰能遊戲何妨傀儡棚凡事不堪君莫怪
儂家面目得人憎

禪頌

吾身非我底為情說著塵勞特地驚五九盡時山更好

澗泉雲鳥自春聲

董文甫

秋夜

見即如無爐上雪淡而有味
水中鹽齋行定慧千燈焰
淨識乾坤一鏡奩

晝眠

莊周先我復天真化蝶飛來管領春
我亦莊周周亦蝶不知若箇是真身

審是堂

按劍人人駭夜光蜀雞合道勝鸞鳳飛蛾可是無分別
直道油燈是太陽

文中子續經

紛紛述作史才雄聽似秋來百草蟲不是春雷轟蟄窟
蚓蛇會得化成龍

史肅

山陰縣

湧雲驅雨不成霖
山徑危行未要深
午夢初迴鳥鳥樂
小亭斜日柳陰陰

過九里山

斷蛇扛鼎兩爭雄
陳迹荒涼萬事空
今日山前無過客
數株衰柳管秋風

放言二首

蓮社從來說陶遠
竹林今不數山王
家雞野鷺何須較
秋菊春蘭各自芳

清風明月無人管
茶鼎薰爐與客同
壯歲羞為襦襪子
如今却羨嘯嘯翁

元德明

過鳳凰山

在鴈門

鳳凰間說似天壇
北去南來馬上看
想得松聲滿巖谷
秋風無際海波寒

餅形嶺早發

在繁時界

海雲蕭瑟雪花乾
人在羊腸百八盤
間客不知名利苦

見時應作畫中看

山園梨葉有青紅相半者戲作一詩

霜輕霜重偶然中一葉雖殊萬葉同不信世間閒草木
解隨兒女作青紅

貴公子詠

高堂紅燭鼓聲齊舞遍纖腰月未西一曲纏頭一雙錦
驂騑空自惜障泥

蓮葉觀音恩禪師所藏同路宣叔賦

瑞相分明一葉中華嚴性海共圓通補陀自有丹青變
畫史區區可得工

觀西巖張永淳畫雁

慘淡經營下筆難畫成不似卷中看知君連夜江湖夢
折葦蕭蕭沙水寒

雪行

五更驢背滿靴霜殘雪離離草樹荒身在景中無句寫
錯教人比孟襄陽

龍眠畫馬

驪黃求馬世皆然滅沒存亡自一天當日鹽車人不識
只今空向畫中傳

寄宗人彥達

交城人

杯酒無緣接舊歡空將書尺問平安要君知我詩成處
落日西風正倚闌

楸樹

道邊楸樹老龍形社酒澆來漸有靈只恐等閒風雨夜

怒隨雷電上青冥

七夕

天河唯有鵲橋通
萬劫歡緣一瞬中
惆悵五更仙馭遠
寂寥雲幄掩秋風

郝天挺

交城學創修文廟

金碧煌煌梵剎雄
元元樓觀五雲中
如何萬代綱常祖
釋菜寧無數畝宮

高憲

元夕無燈

九陌無燈夜悄然
小紅時見點春煙
多情惟有梅梢月
拍酒樓頭照管絃

王特起

偶作

人情爭勝似爭碁
死怕輸人一著遲
黑白不分傍袖手
年來吾亦愛吾癡

絕句二首

山勢奔騰如逸馬
水流委曲似驚蛇
溪靈不欲露天巧
眼力未到雲先遮

鳥語留春春已迴
落花隨意卧蒼苔
清明寒食因循過
萱草薔薇次第開

下第

人間萬事等樗蒲
敢謂何人不得盧
勝負到頭俱偶爾
狂夫安用繞牀呼

劉光謙

寄陳正叔雷希顏

東南形勝古徐州人物休評第幾流
落落陳雷天下士故應連榻卧黃樓

孫鎮

許氏雙桂堂

許家二桂聯翩秀孫氏三枝次第春
盛事若將相比並翰君堂上拜雙親

趙元

渡洛口

一脈寒流兩岸冰
斷橋無力強支撐
忘機羨殺沙鷗好
不省人間有戰爭

田間秋日

好雨知時便放晴
天和醞釀作西成
秋收但得官軍飽
未怕輸租遠十程

禾穗累累豆角稠
松前村落太平秋
熙熙多少豐年意

都在農家社案頭

皤翁偃僂負薪行稚子跳梁剝棗聲不似二姑忙更殺
晚春椎髻脫釵荆

送辛敬之東歸

風埃憔悴舊霜袍老去新詩價轉高橡栗漫山猶可煮
不須低首向兒曹

文章無力命有在一點浩然天地間風雪滿頭人不識
又攜詩藁出西山

大暑

旱雲飛火燎長空白日渾如墮甑中不到廣寒冰雪窟
扇頭能有幾多風

哀古道

山深道壞水縱橫怪得春來少客行不信天教人迹斷
水乾更遣蒺藜生

薛鼎臣罷登封

弄人鼓笛不相疑便著當場傀儡衣終日抱飢唯飲水

也和醉客一時歸

鼎臣材大夫宰登封有惠政今以例罷故有上句

張瓚

游棲巖寺

林表招人白塔明
竹間蘭芷石泉清
惠崇水墨西軒景
煙帶平蕪水帶城

呂中孚

小景

青蕪平野四圍山
山郭依依紫翠間
村遠路長人去少

一竿斜日酒旗閒

春月

柳塘漠漠暗啼鴉
一鏡晴飛玉有華
好是夜闌人不寐
半庭寒影在梨花

水聲

長陂千頃碧淙淙
浪卷秋風過石砦
記得夜來愁聽處
一燈明滅照寒窓

雪

隨風拂拂玉花飄入夜寒窗更寂寥
爐火已殘燈未燼
一簾疎竹白蕭蕭

梨花

等待清明得得芳團枝晴雪煖生香
洗粧自有風流態
却笑紅深睡海棠

柳

風外絲絲裊綠烟輕花初破不成綿
却嫌官路逢寒食
惱亂離愁似去年

王元節

青塚

環珮魂歸青塚月
琵琶聲斷黑山秋
漢家多少征西將
泉下相逢也合羞

與党世傑軍判丁亭會飲

望斷西州萬里家
又將新火試新茶
青油幕下成何事
兩見常山山杏花

李端甫

太白扇頭

巖冰澗雪謫仙才
碧海騎鯨望不回
今日霜降見遺像
飄然疑自月中來

張著

九日

雨沐天容霽欲流
好山誇翠出墻頭
黃花憔悴東籬晚
一段陶家冷淡秋

雨後

西風無意繆纖雲掃盡千峯雨脚痕一片秋光清似水
家家空翠滿柴門

紫泉亭

西風禾黍半蒼黃滿眼秋山冷翠長一片白雲攜雨去
人家籬落伴斜陽

李澥

漫書

胸懷平日窓八達伎倆只今龜六歲唯有閒情如老菊

寒花自信晚能香

二老雪行圖

雪明萬仞鄴西山杖履平生幾往還
滿眼京塵空對畫何時真似兩翁閒

秘書張監墨梅圖

張南人

眼中只有梅千樹不挂世間蜂蝶花
十載江南春夢斷至今清影在君家

燈下梅影

丁年夜坐眼如魚老矣而今不讀書牆角短檠還有用
瓦餅相對一枝疎

王中立

雜詩

獨跨蒼虬下太清春風萬里月華明因君感激為君說
鑿破天機我也驚

雲葉粼粼皺碧空笙簫遞響入天風忽驚風浪耳邊急
不覺形神來世中

題裕之樂府後

常恨小山無後身
元郎樂府更清新
紅裙婢子那能曉
送與凌煙閣上人

寄閑閑公

寄語閑閑傲浪仙
枉將詩酒污天全
黃塵遮斷來時路
不到蓬山五百年

孫錡

望川亭

望川亭上望晴川萬里風烟在眼前
軒檻倚巖高幾許去軒尺五是青天

金全

夜過寶應驛

短篷風急雨聲多濃墨堆雲水拍河
坐久不聞鐘鼓報向人數問夜如何

劉仲游

溫泉

賜浴華清寵幸殊
溫泉水滑洗凝酥
至今西蜀十一月
畫有楊妃出浴圖

劉方叔

華清

廢宇傾垣不復新
開元輦道盡荆榛
惟餘一派溫湯水
長與行人洗路塵

雷發

退藏齋

陋室豈堪陋巷居
退藏天亦隱斯廬
看山破廢工夫外
一炷清香玩易書

御選金詩卷二十

謹案卷十九第五頁前七行避人鷗鳥驚飛盡刊

本盡作去據中州集改

第九頁前二行西窓近事杳如夢刊本杳訛香今
改

第九頁前七行微行入夢去斜斜按中州集載此
詩題作河陰道中第二首與此異

第十五頁前四行禪僧勸讀傳燈錄刊本勸訛歡
據中州集改

第十八頁後三行衰鬢從渠衆目憐刊本目訛自

據中州集改

第二十頁前二行桃李年年擔上看刊本擔訛檐

今改

第二十四頁前一行月轉譙樓天未曉刊本譙訛

樵據中州集改

第十頁前八行屐齒折時渠自著刊本著訛省據

中州集改



總校官庶吉士臣侍朝

校對官檢討臣蕭九成

謄錄監生臣劉天蒼

欽定四庫全書薈要

集部

御選金詩卷二十一

詳校官原任主事臣李斯咏

欽定四庫全書薈要卷一萬八千四百七

集部

御選金詩卷二十一

七言絕句四

劉從益

宋樓道中

十里羊腸路詰盤過花穿柳幾迴還馬頭忽轉青林角
綠繞人家水一灣

戲答侯威卿覓墨

萬松火厄化縑塵依舊徂徠雪裏春冷劑香螺夔一足

破慳分與畫眉人

宮中取張遇墨燒去膠以之畫眉謂之畫眉墨

北園

碧梧斜影落胡牀白葛烏巾滿意涼晏坐不知紅日晚
筍輿歸路麥花香

宋九嘉

東州有感

東城衰草沒黃沙故壘周遭小范衙牧豎那知真老子

龜趺繫馬卧吹笳

途中書事

幼穉扶輪婦挽轅連顛翁媪抱諸孫飢民羸卒如流水
掘盡原頭野薺根

老穉扶攜訪熟鄉驛塵滿路殍相望終朝拾穗不盈把
只有流民如麥芒

攘絲奪麥人爭略烘日吹風天有年湯餅元非小人腹
鹽絲都作大夫賢

被檄從軍

不巾不襪柳陰行朝醉南村暮北莊一旦捉將官裏去

直驅盲馬陣中央

即所乘盲馬而言

留別孫俊民姚公茂

草根殘日射離觴主席風生熱肺腸此去兜零紅照夜
輸君吹笛傍糟牀

酴醿菊

酴醿風味醺人醉著莫東籬愛酒翁一夜金英全換骨

冷香晴雪滿秋風

蓮社圖

野鷺家雞俗好乖
虎溪泉石滿塵埃
壯哉砥柱顏波裏
惟有淵明挽不來

卯酒

臘蟻初浮社甕筍
宿醒正渴卯時投
醉鄉兀兀陶陶裏
底事形骸底事愁

雷淵

讀孔北海傳

漢室風流絕建安老瞞父子力排山可憐魯國真男子
也著區區七子間

濟南汎舟水底見山有感而作

南山已在風塵外更恐飛埃浣碧巔一棹晚涼波底看
浴沂面目本天然

啟母石同裕之賦

千古崩崖一罅開強將神怪附郊禰無情頑石猶胎謗

貝錦從為巷伯哀

洮石硯

緹囊深復有滄洲
丈石春融翠欲流
退筆成丘竟何益
乘時真欲礪吳鉤

過華山懷陳希夷

五季乾坤半晦冥
先生有意事澄清
勦勦四十年来睡
開眼東方日已明

梅影

維摩丈室冷於冰
千劫蕭然無盡燈
天女散花愁不寐
夜深高髻影鬢鬢

河山形勝圖

高峯巨壑與天連
中國關防表裏全
北岸塵氛重回首
不如圖上看風煙

冀禹錫

僧房

上方樓觀袂衣寒
霜後川原眼界寬
我是禪房未歸客

阿師休作長官看

李獻能

玉華谷同希顏裕之分韻得秋字

玉龍落峽噴飛流空翠霏霏晚不收
軟脚山堂一壺酒
暮涼閒對兩峯秋

四皓圖

弋繒安足致冥鴻自是兼懷翊贊功
謾說壺關有遺老
望思臺上已秋風

二老雪行圖

自笑膠膠擾擾身十年匹馬走紅塵何時雪滿平生履
太華峯前約故人

抱琴衝雪又衝風二老風流阿堵中未似村翁眵抹眼
火爐頭上話年豐

從獵口號四首

蓮燭金紗簇簇齊宮槐籠曉尚淒迷景陽鐘罷聽殘漏
萬馬銜霜不敢嘶

閶闔傳符啟九關一聲清蹕駐南山虎賁先導三千士
天馬初離十二閑

爛爛龍旂捧日旂從臣遙認赭紅衣天王清曉親弧矢
初合今冬第一圍

的皪金鉞隨曉星晴天霹靂應絃聲風毛雨血燕雲在
未要草間狐兔驚

李獻甫

夏夜

銀潢淡淡汲疎星一陣涼從雨後生
仰看浮雲成獨卧
數圍蛛網絡中庭

九龍池春望

五年外地看清明袖手低回過客亭
謝絮楚萍無定著
春光如我更飄零

興慶池書所見

短短孤蒲刺水青翠萍開處鑑波明
畫船轉過垂楊外
水面風來聞樂聲

河堤

河堤一決豈天窮
失在當年固白公
誰與麻岡開故道
暫教版籍見山東

新築河堤要策勲
萬人採淨北塢薪
青青好借曹州柳
舊是中原一段春

萬夫卷土障橫流
負土成山水未收
明日落成真盛事
誰能作賦擬黃樓

王渥

蒙城縣齋

穀雨連朝沒麥場官糧未入長官忙堦庭有雨青蛙鬧
牢戶無人白日長

被檄再至揚州制司驛亭有題詩譏予和事不
成者云來往二年無一事青山也解笑行人因
為解嘲

二年奔走道途間知被青山笑往還只向江南南岸老
行人應更笑青山

馬天來

山中

青林寂寂鳥關關
畫出風煙落照間
脫却草鞋臨水坐
野雲分我一邊閒

張本

九日月中对菊同禧伯郎中賦

花上清光花下陰
素娥惜此萬黃金
一杯寒露三更後
誰信幽人更苦心

九日餘香伴月明一觴亦足暢幽情青樓夜半琵琶語
不說人間有此清

子山牢落去江南賦主悲哀尚一堪只恐秋天聞亦苦

併催紅雨下霜巖

庾信哀江南賦
唯以悲哀為主

病魂招得未渾全暝倚秋屏豈是禪一夢忽成霜蝶去
草深三逕若為眠

鬼化斯文念賈生精神琬琢坐寒更一書草就渾衣卧
恨殺東方不肯明

龍山戲馬賞秋光多少新詩入錦囊磨滅英雄豈勝數
千年依舊一花香

申萬全

南征道中

回首秋風謝敞廬崎嶇又復逐戎車人生行止元無定
一葦江湖縱所如

李過庭

讀公孫弘傳

古來好客數平津我道真龍未必真一箇仲舒容不得
不知開闔為何人

李天翼

還家三首

幽花雜草滿城頭華屋唯殘土一丘鄉社舊人何處在
語音強半是陳州

牡丹樹下影堂前幾醉春風穀雨天二十六年渾一夢
堂空樹老吾華顛

殊音異服不相親
獨倚荒城淚滿巾
祇有青山淡相對
似憐我是此鄉人

劉微

春柳應制得城字

翠紐圓勻綠線輕
著行排立弄新晴
更看三月春風裏
散作飛花滿鳳城

馮辰

雨後

時年
十三

東風花外錦鳩啼喚起西山雨一犁綠滿蔬畦人不到
桔槔間立夕陽低

王世昌

方城東寺海棠

苦苣如針草有芒桃花輕薄絮顛狂少陵例有詩沾丐
只在無言到海棠

李廣

自靈泉寺詣偃月山

立馬松間首重回
亂峯無數翠成堆
為尋偃月山前路
直向白雲深處來

史士舉

超化

石根寒溜迸珠璣
尋丈驚看雪浪飛
我是玉川煙水客
暫來盤礴亦忘歸

晉祠

小橋流水竹蕭森
竹裏人家一徑深
只欠東風小籬落

梅花疎淡月籠陰

郭邦彥

秋夜間彈箏篴

露重花香飄不遠
風微梧葉落無聲
倡樓何處教新曲
夜靜月高弦索鳴

村行

棗花初落路塵香
燕掠麻池乍颺颺
一片雲陰遮十頃
賣瓜棚下午風涼

芹葉蘆花岸兩邊
釣溪石畔落孤鳶
小畦引入平流水
麻稈森森已拍肩

豆葉芄芄麻葉光
植禾得雨又催黃
田家樂事誰真得
牧子行歌醉叟狂

田錫

牧牛圖

干戈擾擾徧中州
挽粟車行似水流
何日承平如畫裏
短蓑長笛一川秋

元好古

中秋無月

佳辰無物慰相思
先賞空吟昨夜詩
莫怪更深仍坐待
密雲或有暫開時

讀裕之弟詩藁有鴛聲柳巷深之句漫題三詩
其後

阿翁醉語戲兒癡
說著蟬詩也道奇
吳下阿蒙非向日
新篇爭遣九泉知

鴛鴦深樹只聞聲不著詩家畫不成慙媿阿兄無好語
五言城下把降旌

傳家詩學在諸郎剖腹留書死敢忘

先人臨終有剖
腹留書之語

背

上錦囊三箭在直須千古說穿楊

題江村風雨圖

渡口舟橫水拍空墨雲傾雨樹號風江山不到紅塵眼
半幅煙綃想像中

秦略

雪行

匹馬東來冰雪天
蒼山手冷隨吟鞭
烟中髣髴聞雞犬
不覺人家到眼前

鳥影過寒塘

著眼分明莫作疑
從來形影本同歸
不應水底青天上
更有飛禽仰面飛

同希顏裕之賦樂真竹拂子

覓箇龜毛抵死難
直教擊碎釣魚竿
世人不用生分別

信手拈來總一般

少室山卓劍峯

神威洗盡世間讐
雷歇雷閒怒氣收
一柄太阿留少室
却擎空掌華山頭

此身

此身日日一簞貧
貧裏留殘自在身
獨把筇枝行又立
東風花柳不嗔人

麝香

山麝逃風遠谷藏一山行過四山香
臍堂自養千鈞弩
枉怨虞人鼻孔長

趙洛道中

柔青初散隴頭桑
村落人家布穀忙
一段蕪菁渾著角
葉間猶有幾花黃

劉昂霄

送裕之往洛陽兼簡孫伯英

洛水嵩山壽樂堂
每從熱惱得清涼
竹牀石枕應無恙

尚可分風供十方

題裕之家山圖

萬里神州劫火餘
九原夷甫有餘辜
作詩為報元夫子
莫倚家山在畫圖

寄申伯勝

直氣南山相與高
爭教塵土浣青袍
征科頗似曾料理
差勝三軍作馬曹

執版那能拜下風
世間禮數困英雄
狂風醉舞人誰識

憔悴通泉郭代公

連昌能隔幾牛鳴不見令人鄙
吝生乘興時思一相訪
劇談豪飲見真情

田紫芝

冥鴻亭下第後作

眼底功名一物無飛揚跋扈竟何如
青雲岐路多辛苦
賴得皇家結網疎

王萬鍾

春宵

風尖月細春猶淺
酒冷燈昏夜向深
人在西軒愁不寐
一年間事總經心

江村風雨圖

秋風撼撼澹林暉
煙靄昏昏失翠微
一段蓴鱸江上興
蓬窗岑寂夢魂飛

張仲宣

下第

主司頭腦舊冬烘更著書郎骨相窮曉賦得官何足道
直須遮馬困吳融

戲題石鹿蜂猴畫卷

橫槊將軍馬足塵判花學士筆頭春功名果屬丹青手
造物如何戲得人

王敏夫

李氏友雲樓

霧幕煙迷十二欄壺觴招我一躋攀黃簾卷起湘川竹

分得西州數點山

徐好問

龍門

疏鑿西來道路通行人萬古翠微中南山山寺題詩滿
一字何曾到禹功

呂大鵬

夏日

北渡
後作

旋移石枕拂藤牀細灑槐陰趁晚涼大地噉噉困爐鼎

老天不肯下殘陽

縫掖

縫掖無由挂鐵衣
劒花生澀馬空肥
燈前草就平南策
一夜江神泣涕歸

曹用之

憶舊

花鳥巡簷喚曉晴
喚來和氣滿春城
春風二十年前客
煮酒青梅也後生

馬舜卿

會州道中

山腰薄雪眩朝曦未放陽和入燒痕一片長安世情月
梨花院落幾黃昏

張子權

遊黃華

溪流漱石振蒼崖林樹號風吼怒雷為謝山靈幸寬貫
漫郎投劾已歸來

張介

贈詩人楊叔能

我貧自救如沃焦君來過我亦何聊為君欲寫貧士歎

才思殊減荒村謠

楊初以荒村謠得名

麻九疇

牛歎

誰憐宿料一生無身後仍遭金十奴帷蓋却教蒙狗馬
不知何事負農夫

清明

村村榆火碧烟新
拜掃歸來第四辰
城裏看家多白髮
遊春總是少年人

暮春山家二首

山煙向晚白濛濛
人過梨花樹底風
一犬不鳴村徑黑
野燈孤起遠林中

語闌壯氣欲消磨
奈此青燈永夜何
壁上取琴彈一曲
不知天外落銀河

紅梅

一種冰魂物已尤朱脣點注更風流
歲寒未許東風管
淡抹穠粧得自由

史才

陪陳彥文謁筠泉榮上人

強隨禪客到西禪
竹柏團青蔭石泉
一首小詩吟不就
閒情元在落花邊

史學

宮詞

寶帶香襟水府仙
黃旂彩扇九龍船
薰風十里瑤華島
一派歌聲唱采蓮

李道人崧陽歸隱圖

石壁城頭夜斬關
軟紅塵底曉催班
道人一笑那知許
門外清溪屋上山

晚梅

孤根春半恰春回
剛逐天桃豔杏開
蝶子蜂兒應有語

東風元不為渠來

七夕

箱牛回馭錦機閒
天上悲懽亦夢間
月夜竝肩人不見
蕭蕭風葉滿驪山

醉後

觀魚暫覺心差樂
化蝶元來夢亦忙
得似醉中都放下
春風自與百花香

宋景蕭

春雪用上官明之韻

噠噠春蟲鬧撲窗
地爐茶鼎蚓聲長
詩中有味清於酒
只欠冰梢數點香

劉勲

讀張仲揚詩因題其上

布衣一日見明君
俄有詩名四海聞
楓落吳江真好句
不須多示鄭參軍

偶作

將軍馬躍五撾鼓客子車行三唱雞白髮書生無伎倆
滿窓紅日醉如泥

杜善甫乞炭

筆口酸嘶解說窮寒爐隨手變春紅因君大笑涪翁拙
費盡奇香得馬通

秋涼

桃笙乘勢獻微涼紈扇無功送暑光老病不嫌風露冷
莫教添作鬢邊霜

愛詩李道人嵩山歸隱圖

脫却儒冠已自閒
更令家事勿相關
百錢便挂青藜杖
不看先生紙上山

同趙宜之賦梨花月

雪樹生香淡月邊
相媒相合鬪清妍
空庭冷落秋千影
虛度良宵亦可憐

不寐

酪奴作祟攪秋眠
追咎前非四十年
一夜蟲聲相計會

併催白髮到愁邊

戲鄭秀才

張老豆新頻見餉鄭家米鑿不須賒客來粥熟吾能辦
要與齊奴鬪咄嗟

春日

粉蝶耽香夢正迷黃蜂和蜜計何癡小軒無事誰如我
卧看楊花點硯池

贈馬元章

車轂春雷震屋山馬蹄亂電響柴關何時得箇茅菴子
不在車塵馬足間

趙達夫

紅梅

西湖句好已成塵蠟點都能幾許春乞與瓊兒薄梳洗
才情留待月中人

柳

楊柳攬春不耐秋十分憔悴儘風流水邊沙際風煙冷

收拾殘陽合暮愁

張子和

瀝亭

學劍攻書兩不成年來蹤跡愈如萍而今瀝水無魚釣
收拾綸竿海上行

酷嗜醫經五十年野芹曾獻紫宸前而今憔悴西山下
更比文章不直錢

齒豁頭童六十三邇來衰病百無堪舊遊馬上行人老

不似當初遇汝南

辛愿

過崧山

催老年光袞袞來
好懷知欲向誰開
箕山潁水春風裏
呼起巢由共一杯

隆德故宮

蛇分鹿死已無秦
五十年来漢苑春
問著流鶯無一語
柳條依舊拂牆新

山寒

山寒春靜早關門
新月微光照短垣
可恨暮雲欺落景
却將飛靄助黃昏

山園

歲暮山園懶再行
蘭衰菊悴頗關情
青青多少無名草
爭向殘陽暖處生

雷瑄

南國

南國春生江水肥
烏樯風扇錦帆歸
吳兒日暮棹歌發
驚起鴛鴦相背飛

李汾

清明

鳴珂振轂滿重城
春日綿綿老燕鶯
人在碧雞坊外住
澹隨流水過清明

下第

學劍攻書謾自奇
回頭三十六年非
春風萬里衡門下

依舊并州一布衣

磻溪

封侯輸與曲如鉤
冷坐磻溪到白頭
老婦厨中莫彈鉞
白魚留待躍王舟

感寓述史雜詩五十首

并引
錄五首

正大庚寅予行年三十有九獻賦明庭為有司所
病遂有不遇時之歎
阜衣斗食從事史館以素非
所好愈鬱鬱不得志卧病中僻居蕭條盡日無來

人緬惟先哲凡所以進退出處之際窮達榮辱之
分立身行道建功立事關諸人事者竊有所感焉
於是始自騷人屈平以來下逮漢晉隋唐諸公終
之以遠祖鴈門武皇作為述史詩五十首以自慰
其羈旅流落之懷述近代則恐涉時事故斷自唐
以下不論嗚呼三百篇大抵皆聖賢感憤之所為
作也余以愚忠謬信獲譏於斯世久矣非敢示諸
作者庶幾後世有楊子雲者出或能亮予之宿心

是歲秋七月既望并州人李汾引

蘇客卿秦

游說諸侯獲上卿賈人脣舌事縱橫可憐一世癡兒女
爭羨腰間六印榮

韓淮陰信

仗劍淮陰去復還舉頭西望識龍顏堂堂竟握真王印
未害男兒辱胯間

叔孫奉常通

秦時博士魯諸生漏網驪山百丈阮邂逅劉郎習綿蕪
便能彈厯漢公卿

馬中令周

脚踏長安陌上塵布衣西上欲誰親君王不省常何策
憔悴新豐一旅人

遠祖鴈門武皇

死心唐室正諸侯鐵馬南來隘九州當日三垂岡上意
諸孫空抱腐儒羞

邢安國

過唐州西李口

白沙翠竹溪上村
漁家賣魚喚行人
西風吹皺一溪水
水光日影金鱗鱗

御選金詩卷二十一